

Immikkoortortamut arlaannaannulluunniit naammattumik attuumassuteqanngitsumut whistleblowerit pillugit misissuineq nooqqullugu Naalakkersuisut peqquneqarnissaanik Inatsisartut aalajangiiffigisassaattut siunnersuut
(Inatsisartunut ilaasortaq Tillie Martinussen, Suleqatigiissitsisut)

Akissuteqaat

(Aningaasaqarnermut Nunanilu Avannarlerni suleqatigiinnermut Naalakkersuisoq)

Aappassaaneerinnineq

Aallarniutigalugu Inatsisinut Ataatsimiititaliap isumaliutissiissusiornermini sukumiisumik suliaqarneranut aammalu Inatsisartunut ilaasortap Tillie Martinussenip aalajangiiffigisassatut siunnersuuteqarneranut Naalakkersuisut sinnerlugit qujassuteqarfigaakka.

Naak siunnersuutip siullermeerneqarnerani siunnersuut itigartitsissutigineqassasoq Naalakkersuisunit inassutigineqaraluartoq Inatsisinut Ataatsimiititaliami amerlanerussuteqartut siunnersuutip akuersissutigineqarnissaa inassutigigaat Naalakkersuisunit maluginiarneqarpoq.

Siunnersuut una taamatut isikkoqartillugu Inatsisartunit akuerineqarpat siunnersuutip atuutsilernissaanut aningaasalersorneqarnissaanullu periarfissat Naalakkersuisunit soorunami misissorneqassapput, tamanna 2020-mi aningaasanut inatsimmik isumaqatigiinniarnernut atatillugu tapersersorneqarsinnaassappat.

Aammattaaq siunnersuut akuerineqassappat tamanna aalajangiiffigisassatut siunnersuummut ataatsimiinnermi matumani akuerineqartussatut naatsorsuutigineqartumut, aalajangiineq tamanna atassuteqartutut Naalakkersuisunit isigineqassaaq. Matumani eqqarsaatigineqarpoq Inatsisartunut ilaasortamit Steen Lyngemit siunnersuut peqquserluuteqartarnerup akiorniarneqarnera pillugu nassuiaatip (UPA2019/49) agguanneqarnissaanut attuumassutilik.

Taamaalilluni suliami matumani whistleblowerimik aqqissuussinerup aqqissugaanikkut ilanngunneqarnissaa tulluartuussaaq. Tamatumunnga ilanngullugu immikkoortortamut naammaginantumik arlaannaannulluunniit attuumassuteqanngitsuunissamik piumasaqaatinik eqquutsitsisumut whistleblowerimik misissuinerit qanoq ingerlanneqartarnissaat misissorneqartariaqarpoq.

Tassunga atatillugu immikkoortortap naammaginantumik arlaannaannulluunniit attuumassuteqanngitsutut misissuinerit tamakku ingerlassinnaanerai kisiat pinnagu, aammali nalunaaruteqarnissamik isumaliuteqarsinnaasut eqqarsaatigalugit immikkoortortaq arlaannaannulluunniit attuumassuteqannginnersoq pingaartinneqartariaqartoq Naalakkersuisunit maluginiarneqarpoq. Siunnersuuteqartup nammineq oqaatigisaatut misissuinerit Namminersorlutik Oqartussat Kukkunersiuisoqarfiannit

ingerlanneqartassanersut, imaluunniit misissuinerit assersuutigalugu kukkunerisiusumit eqqartuussissuserisumilluunniit ingerlanneqartassanersut isumaliutigineqartariaqarpoq.

Aammattaaq naammagittaalliuutigineqartut inatsisitigut isumannaatsumik pisariaqartumillu mianerineqarnissaat eqqaamassallugu pingaaruteqarpoq. Tassunga atatillugu oqaatigineqassaaq nalunaarutigineqartut amerlagisassaannngitsutut isigineqartut amerlanerpaartaat suliffeqarfimmi aaqqiagiinngissutinut attuumassuteqarnerusorinarmata.

Taama oqaaseqarlunga Naalakkersuisut siunnersuut Inatsisartunut oqaluuserisassanngortippaat.